

CURAÇAO Y ARUBA LO BIRA PARTI DI E ESCENARIONAN DI "BOLIVAR THE LIBERATOR"



ORANJESTAD (AAN) -- E gerente di benta di e Proyecto Bolivar Maria Gonzalez, a expresa den conferencia di prensa, cu a tuma lugar recientemente na Marriott Hotel, cu Aruba ta un isla di poco habitante, pero di amigonan grandi.

"Aruba ta nos sede legal y pa nos ta hopi importante pa bin aki pa conclui e prome seccion di e gira cu nos a caba di haci.

Nos a bin for di Venezuela unda nos a bishita Caracas, Aragua y Carabobo; despues nos a bay Colombia na e ciudadnan di Cartagena y Bogota, y awor nos a bin Aruba pa cera e prome seccion aki den nos tera legal, cual nos ta stima hopi y cu a yuda nos mashá", Maria Gonzalez a bisa.

El a expresa palabranan di elogio pa Mr. Hellen Lejuez, ken for di cumzamento ta pushando e proyecto. Tambe el a menciona DIARIO y ATV como dos medio di comunicacion cu ta aportando hopi informacion tocante e proyecto.

Seguidamente Sr. Edgard Meinhardt, productor, a duna

di conoce kico tin cla caba den e proyecto.

"Nos tin cla e desaro y revision di tur e guionnan y e aspectonan financiero. Awor nos ta bay cuminza cu e etapa di produccion cu ta e aspecto cu nos ta promoviendo a traves di e bishitanan cu nos a haci na Venezuela, Colombia y Aruba.

Esaki pa cuminza loke ta e trabao di definicion di locacion, vestuario, etc. pa duna inicio na e filmacion riba su mes cu tur e material cu worde produci na cumzamento di otro aña".

ESCENARIONAN

E escenarionan unda e pelicula "Bolivar the Liberator" ta esnan original unda e historia mes a tuma lugar.

"Nos ta intentando pa filma den e escenarionan original te unda esaki ta posible. Obviamente tin dificultad den cierto zonanan pero por reemplaza un area por otro. Pero nos ta examinando prome tur loke ta Colombia, Venezuela, Ecuador, algo di Peru y Bolivia cu tambe lo por wak den e pelicula, y tambe lo filma na Mexico, Merca, Inglatera, Spaña,

Francia, Austria y Italia. Dentro di tur esaki nos lo defini cual ta e locacionnan mas adecua y ki relevancia cada area tin den e totalidad di e produccion", segun e productor a splica.

El a agrega cu tambe lo filma na Curacao den a area unda cu Bolivar a refugia un tempo y su relacion cu Brion a surgi.

"Obviamente tin cierto areanan historico na Curacao cu no por worde reproduci na otro caminda. Algun aña pasa nos a papia cu e Teniente Gobernador aya, y el a priminti duna tur su apoyo pa logra incorpora Curacao. Logicamente teniendo como sede Aruba nos lo trata pa e mayor parti di e Islanan Caribense worde representa pa Aruba", e producto a indica.

Maria Gonzalez a agrega na esaki: "nos kier pa e hendenan di Hollywood conoce nos paisnan, tur nos escenarionan, pa despues cuminza e parti tecnico di loke e produccion ta bay bira". Idioma oficial di e pelicula ta Ingles, pero lo tin doblaje na Spaño pa coloca e produccion riba mercado Latinoamericano.

MINISERIE

Entre e miniserie cu lo worde transmiti den television mas of menos un aña y mey despues di a estrena e pelicula, y e pelicula mes tin diferencia di conceptionan.

"Un ta cubri e arco di triunfo di Bolivar te Carabobo y e otro ta explora den mas detaye e relacionnan di e Libertador cu otro personahenan di historia, y e surgimento di loke e America Latino di awendia ta", Sr. Meinhardt a bisa.

Tanto e pelicula como e miniserie lo worde bendi na tur pais di mundo.

MERCADEO

Maria Gonzalez a indica cu obviamente nan ta trahando riba e proceso financiero na Venezuela. E aspecto di mercadeo pa e lanzamiento final ta canando riba bon caminda, y solamente ta falta so introduci e accionnan na e mercado di Estados Unidos.

"Nos ta caba den e trabao tecnico. E campaña na Venezuela tabata hopi fuerte. El a tuma varios luna di hopi mercadeo y publicidad den prensa, radio, television y publicidad riba caya den henter e pais", el a menciona.

E HISTORIA

Sr. Alan Bridges, mescos cu el a splica den entrevista cu DIARIO, a señala cu e historia di Bolivar lo worde hiba na e pantaya grandi basa riba e berdad, sin exageracion, y sin disminucion.

"Solamente siguiendo e berdad aki y haciendo e cu e berdad nos por logra representa e homber cu Bolivar tabata. Bolivar tabata un homber di hopi dimension: general, poeta, amante, algun biaha brutal, pero tur e facetanan aki ta yuda nos compronde cual ta e heroe, pasobra esey Bolivar ta riba tur cos", el a indica.

Riba e palabranan aki, sra. Gladys Pearce, co-productor Asocia a agrega: "Ta e homber a bira heroe. Nos no ta tuma e heroe pa converti e den homber".

FECHA

E pelicula lo worde estrena na luna di November di aña 1999.

"Nos ta den un proceso di pre-produccion. E filmacion lo cuminza na januari '99 y lo caba na november di e mesun aña cu ta e luna cu e pelicula lo worde estrena", Maria Gonzalez a bisa.

